

NOVEMBER BULAN KELUARGA KEBANGSAAN

KPWKM terus komited semai semangat kekeluargaan masyarakat menerusi konsep Kasih Madani

Oleh Suliati Asri
suliati@hmetro.com.my

Kuala Lumpur

Bagi menyokong dan mengiktiraf sistem sokongan keluarga yang membantu ke arah pembangunan negara sejahtera dan pembinaan daya tahan negara, November setiap tahun diisytiharkan sebagai Bulan Keluarga Kebangsaan (BKK).

Mula diperkenalkan sejak 2012 kini menjadi acara tahunan yang dianjurkan Kementerian Pembangunan Wanita, Keluarga dan Masyarakat (KPWKM) melalui agensinya Lembaga Penduduk dan Pembangunan Keluarga Negara (LPPKN).

Bagi tahun 2023, dengan mengadaptasi konsep Malaysia Madani yang diperkenalkan Perdana Menteri Datuk Seri Anwar Ibrahim pada akhir 2022, konsep Kasih Madani yang merujuk kepada lima nilai teras dalam keluarga iaitu Kasih Sayang, Akhlak, Sihat dan Selamat, Ilmu dan Harmoni.

Konsep ini diketengahkan melalui Kempen Kasih Madani: Keluarga Harmoni, Negara Madani, yang mempamerkan kepentingan agenda keluarga yang kukuh sebagai tulang belakang sebuah negara Madani yang progresif.

Melalui konsep ini juga, hasrat untuk meraikan perpaduan dan kepelbagaian yang menyerlahkan kepentingan peranan institusi keluarga dalam membina generasi lebih baik difatirkan melalui penganjuran Sambutan November Bulan Keluarga Kebangsaan 2023 (BKK 2023) iaitu kemuncak kepada kempen Kasih Madani.

BKK 2023 DIDEDIKASIKAN UNTUK MEMUPUK HUBUNGAN KEKELUARGAAN

LPPKN dalam satu kenyataan berkata, November Bulan Keluarga Kebangsaan adalah sambutan untuk memupuk hubungan kekeluargaan.

Menurut kenyataan itu, inilah masa untuk masyarakat menghargai orang yang disayangi dengan menyatakan rasa terima



KONSEP Kasih Madani pupuk lima nilai teras dalam keluarga iaitu kasih sayang, akhlak, sihat dan selamat, ilmu dan harmoni.

3,000

Bilangan ahli keluarga
meriahkan KASIH
Family Fun Walk.

kasih atas sokongan yang tidak berbelah bagi dan untuk merenungi mengenai kepentingan keluarga dalam kehidupan.

"Sambutan BKK ini bukan saja untuk meraikan ahli keluarga terdekat, tetapi juga peluang untuk mengiktiraf masyarakat yang lebih luas, kumpulan sokongan keluarga yang merangkumi setiap individu, kaum, dan agama," katanya.

Sambutan BKK juga adalah manifestasi kerajaan bagi mengiktiraf sistem sokongan keluarga yang membantu ke arah pembangunan negara sejahtera dan pembinaan daya tahan negara.

Sambutan ini juga dianjurkan secara meluas di seluruh negara dalam memastikan keseragaman dan komitmen utuh antara semua agensi Kerajaan ke arah usaha mencapai serta menjamin kesejahteraan institusi keluarga dan pembangunan sosial negara.

"Pelaksanaan BKK mampu memberi nilai pulangan kepada negara dalam bentuk pengukuhan kesejahteraan keluarga yang diukur berdasarkan Indeks



Kesejahteraan Keluarga (IKK).

"Penghasilan IKK menjadi satu jajaran baharu kepada usaha kerajaan dalam memartabatkan institusi keluarga yang mana IKK dijadikan sebagai salah satu Petunjuk Prestasi Utama (KPI) Nasional dalam Rancangan Malaysia Ke Sebelas (RMKe-11) dan Rancangan Malaysia Kedua Belas (RMKe-12).

"Oleh itu, pelaksanaan BKK ini wajar diberi perhatian dan disambut oleh semua pihak khususnya agensi Kerajaan kerana usaha yang holistik serta berterusan diperlukan.

"la bagi membantu keluarga berhadapan cabaran sosial dan ekonomi masa kini dan pada masa hadapan demi kesejahteraan keluarga," katanya.

Bertemakan "Keluarga Harmoni, Negara Madani",



ANWAR (kiri) ketika melancarkan Pakej Kasih Madani.

sambutan yang dilancarkan pada 4 dan 5 November lalu oleh Perdana Menteri di Dataran Putrajaya, Putrajaya ini amat sinonim dan seiring dengan modenisasi dalam kehidupan masyarakat masa kini.

BKK 2023 ini juga adalah satu platform penting bagi menghargai kepentingan institusi keluarga yang menjadi cerminan kepada masyarakat yang stabil dan sejahtera.

Sepanjang dua hari itu, pelbagai aktiviti dan pengisian menarik dianjurkan antaranya KASIH Family Fun Walk dengan penyertaan daripada 3,000 ahli keluarga, Himpunan Keluarga Madani dengan penyertaan lebih 2,000 orang dari kalangan Sahabat Remaja KafeTEEN, komuniti Rukun Tetangga (KRT) dan Yayasan Suka-relawan Siswa (YSS).

Bukan itu saja, turut di-

adakan Mini Karnival Kasih Madani yang membawakan aktiviti santai masa bersama keluarga dengan penyertaan 240 keluarga dan Ekspo KASIH MADANI yang membawakan penyertaan lebih 45 agensi melalui empat segmen iaitu Kasih Keluarga, KASIH Remaja, Kesejahteraan Ekonomi dan Cuti-cuti Keluarga.

ANUGERAH KHAS KASIH MADANI

Sebagai usaha untuk terus memperkukuhkan institusi keluarga melalui Sambutan BKK 2023, Anugerah Khas Kasih Madani yang mempunyai dua kategori iaitu Syarikat Korporat CSR dan Badan Bukan Kerajaan, diperkenalkan.

Bagi kategori pertama, anugerah ini diberikan kepada syarikat korporat yang memberikan sumbangan dalam bidang tanggungjawab sosial korporat (CSR), khususnya yang berfokus pada sumbangan kepada keluarga dan komuniti.

Kategori ini dimenangi Tenaga Nasional Berhad (TNB) atas sumbangan CSR dalam pelbagai projek kemasyarakatan.

Manakala bagi kategori kedua diberikan kepada badan bukan kerajaan (NGO) yang aktif menjalankan pelbagai aktiviti dan program yang memberi sumbangan yang signifikan kepada aspek kekeluargaan di dalam masyarakat di menangi oleh Pertubuhan IKRAM Malaysia.

Sepanjang November ini, BKK 2023 turut disambut di setiap negeri dengan pelbagai aktiviti berteraskan pengukuhan nilai keluarga.

KUCHING DESTINASI PENUTUP BKK 2023

Sebagai penutup kepada Sambutan BKK 2023, LPPKN Sarawak akan menganjurkan Sambutan BKK 2023 peringkat Negeri Sarawak pada 26 November ini di pekarangan Masjid Darul Hana, Kuching yang akan disempurnakan oleh Menteri Pembangunan Wanita, Keluarga dan Masyarakat, Datuk Seri Nancy Shukri.